



Mujo, kad ćeš mi vratiti pare?

Šutalo je rekao da mi neki ljudi iz Sarajeva mogu srediti blažu kaznu za sina, a Smajlović da ne može vratiti pare, jer "u ovome nije sam"



Smajlović pred Sudom / DIDIER TORCHE

Suđenje bivšem istražiocu Tužilaštva BiH Muji Smajloviću, optuženom za primanje mita od osuđenih kriminalaca kako bi im pomogao u postupcima, nastavljeno je saslušanjem tri svjedoka Tužilaštva.

Zdravko Jurković, koji je u zatvoru zbog šverca drogom, ispričao je da je Smajlovića upoznao nakon hapšenja sina Davora 2010. godine (osuđen na 5,5 godina zbog trgovine drogom, op.a). Naglasio je da mu je Miro Šutalo, profesor koji je priznao dilanje drogom, rekao da poznaje ljude iz Sarajeva koji mu mogu srediti blažu kaznu za sina.

- Za to sam spremio 10.000 eura, kazao je svjedok.

Napomenuo je da je ranije Smajloviću dao pušku i pištolj, jer mu je obećao pomoću drugoj presudi (akcija Leotar iz 2008). Ali, kako je saznao, ni za tu presudu, ni za sina, nije ništa učinio.

- Smajlović je tada rekao: "Ja vam ne mogu vratiti novac, nisam u ovome sam".

Jurković je zamolio sudiju Izu Tankića da pita optuženog kada će dobiti svoj novac.

- To ćete morati rješavati u posebnom postupku, istakao je Tankić.

Zaštićeni svjedok, uposlenik **SIPA**, potvrdio je da se sastajao sa Smajlovićem.

- Stavio sam na sebe opremu za prisluškivanje i našao se s njim. Želio je od mene dobiti više informacija o Robertu Iličiću (osuđivani narkodiler iz Hrvatske, op.a), kazao je ovaj svjedok.

Treći svjedok Emir Kajmaković pustio je audio, video i fotozapise. Smajlovićev branitelj Vlado Adamović nije imao pitanja ni za jednog od svjedoka. Naredni pretres je 12. jula.

E. G. P.